

P O L O N I A E

R E G N V M.

POLONIA, quæ à planitie terræ, (quam ipsi vernaculè etiamnum Pole vocant) nomen habet, vasta Regio est, quæ Schlesia ad Occidentem proximat. Hungaris, Lithuanis, ac Prutenis cõtermina. Diuiditur in Maiorem & Minorem. Maior dicitur, quæ Septentrionem aspicit, habetque Guesnam, Posnauiamque, insigniora loca. Minorem vocant, quæ ad Meridiem vergit, habetque nobilem Urbem Cracotiam, ad caput Vistulæ, quæ Regionem diuidit, sitam; reliquæ Ciuitates parum nitidæ. Ex mæceria domos fermè omnes componunt, plerasque luto lintunt. Plaga Regionis palustris est, & nemorosa. Potus genti cereuisia. Vini rarissimus vsus; nec vineæ cultura cognita. Equitatu in bello maximè præstat. Ager cereris ferax; multa genti armenta; multa ferarum venatio. Melle abundat. Habet & Salis maximam copiam, quod ex terra eruitur. Habet & æris fodinas in montium iugis, Tatri, ab incolis dictis: nec non sulfuris. Sub Regno Poloniae continetur Lithuania, Samogitia, Masouia, Volhinia, Podolia, & Russia, quæ Meridionalis cognominatur, & Ruthenia quoque à nonnullis dicitur. **LITHVANIA**, magna sui parte palustris; plurimumque nemorosa; & eò, difficilis aditu, ac quodammodo inaccessa, aquis omnia obtinentibus; Hyeme commercia cum Lithuanis habiliora: paludibus & stagnis alta glacie concretis, niueque superinfusa, fiunt omnia mercatoribus peruisa. Rara in Lithuania Oppida; Villarum incolatus infrequens. Accolarum diuitiæ, pecora; pellesque preciosæ multigenum ferarum, quibus Regio insigniter scatet. Ceræ ac mellis abundans. Vsus pecuniæ genti nullus. Sermo genti, vt Polonis, Sclauonicus. Caput Regionis, Vilna est, Episcopalis Ciuitas, tantæ magnitudinis, quantæ Cracouia. Domus tamen, contiguæ in ea non sunt; sed veluti in rure, horti intermediant & pomaria. **SAMOGITIA** (quod eorum lingua terra inferior sonat) habet gentes proceræ & pulchræ staturæ; agrestes tamen, & incultis moribus; parco victu viuentes. Nullus illic ædificiorum Nobilium, sed tantummodò tugurij vsus. Ex ligno & culmo fit structura. Largius ab imo sensim operis incremento ædificium in arctius cogitur, in carinæ seu galeæ maximæ similitudinem elaborata. In cacumine fenestra vna, supernè lumen reddens, subter quam focus, cibos parabiles coquens. In ea domo, se, vxores, pignora, seruos, ancillas, pecus, armentum, frumentum, & omnem suppellectilem condunt. **MASOVIA** Regibus Poloniae feudalibus, huius Metropolis est Varsovia, vbi optimus conficitur medo, potus genus est ex melle constans. &c. **VOLHINIA** Regio, omnium rerum, propter agri fertilitatem, abundans; & Oppidis, Castellisque frequens. **PODOLIA**, agro tam fertili est; vt eius gramen, perticam tribus diebus supercrescendo contegat; & aratrum in locis graminosis derelictum paulò pluribus sepiat, & cooperiat. Mellis quoque maxima copia. Præcipua huius Vrbs est Camyenetz. **RUSSIA** abundat equis, bobus, & ouium gregibus, preciosissimisque pellibus. Potu vtuntur ex melle facto. Adducitur & vinum ex Pannonia, Moldauia, & Walachia. Huius metropolis est Leunpurg, Latini Leopolim vocant. Plura habes de his Regionibus apud Mathiam à Michou, in libello de Sarmatiis; Alb. Crantzius in descriptione Wandaliæ; Bonfinius de rebus Hungaricis. Sed omnium optimè eas descripsit Martinus Cromerus in Chronico Poloniae; & Sigismundus ab Herberstein in suis Moschouiticis Commentariis. Vide & Seb. Munsterum.